

Furriadura in sardu de su contu 'L'EREDITÀ DEL MARITO' chi ndi bessit de sa pàgina corantatres (p. 43) de su liburu de MARCO PLACENTINO, "*Soleminis. Leggende e misteri. Contus de forredda*", Dolianova, Edizioni Grafica del Parteolla 2017.

“SA SIENDA DE SU MARIDU”

Una fèmina, fiuda frisca, no scièt comenti fai a bivi, ca su maridu dda fiat morta, lassendi-dda pagu sienda. Una noti a su maridu ddu iat sonnau narendi-dda custus fueddus:

«Torrendi meda agoa, apu cuau asuta de terra una sienda manna in su sartu nostu, in d-unu logu chi no sciri nisciunus. Candu ti ndi as a scidai, impunna innui ti apu a nai imoi, su logu ddu as a arreconnosci depressi ca sa terra si-ndi sinnalat de totu sa àtera po su colori.

Laga de fai atenzioni: as a depi scorrovonai cun totu e duas is manus, a intra de dii e, mancai calincunu ti at a biri, tui ddi as a depi nai totu, cumbidendi-ddu a ti agiudai cun sa promitèntzia de ddi intregai sa metadi de su scusòrgiu».

De bonu mengianu, sa fèmina fiat andada currenti a su logu innui ddi iat nada su maridu. A sa terra dda iat arreconnota luegus etotu e iat cumentzau a scorrovonai cun totu e duas is manus.

Su fossu fiat giai mannu, candu in su momentu etotu fiat passendi unu òmini de bidda sua. Sa fèmina si-ndi fiat arregordada de is fueddus de su maridu, perou ddi fiat bènnia a conca ca cussu òmini fiat arricu meda, duncas a intrus de issa iat barrinau:

«Poita deu, ca seu pòbura, depu spartziri su tesoru miu cun d-unu arricu?», diaici, candu su òmini ddi iat preguntada su chi fiat faendi, issa ddi iat arrespustu ca fiat circhendi arrèxinis de papai poita fiat pòbura. Iat sodigau a scorrovonai.

A parti de agoa, scorrovonendi iat agatau una pinciada, iat artziau su crobotori, perou ànturu no nci fiant marengus de oru, sceti cinixu e cràboni.

Sa genti de Solèminis fiat totu aproillada a ddu biri a cussu fossu giai famau e cun pagus farrancadas de cinixu e cràboni.

Custa fèmina fiat morta pòbura e no si fiat perdonada po totu vida de no èssiri postu a menti a is arrecumandìtzias de s'ànima de su maridu.//